

# Служба иконе Божией Матери «Свенско-Печерской»



15 июля 2016 г. 18:57

Текст службы иконе Божией Матери «Свенско-Печерской» утвержден решением Священного Синода от 15 июля 2016 года ([журнал № 70](#)).

## Служба иконе Божией Матери «Свенско-Печерской»

Месяца мая в 3-й день

### ПРАЗДНОВАНИЕ ПРЕСВЯТЕЙ ВЛАДЫЧИЦЕ НАШЕЙ БОГОРОДИЦЕ И ПРИСНОДЕВЕ МАРИИ РАДИ ИКОНЫ ЕЯ, ИМЕНУЕМЫЯ "СВЕНСКАЯ - ПЕЧЕРСКАЯ"

#### НА ВЕЛИЦЕЙ ВЕЧЕРНИ

На Господи, воззвах: поставим стихов 8 и поем стихиры Триоди 3 и Богородицы **стихиры 5 глас 8. Подобен:** О преславнаго чудесе:

Днесь светло блистает / Воскресение Спаса Христа, / и Пресвятая Богородица православных собирает / к Свенстей иконе Своей, / яко Матерь о чадах веселящися, / просвещение душам и телесем дарует, / освящающи и спасающи притекающи к Ней, / избра бо Ю Господь строити и покрывати / Христоименитое стадо, рабы Своя.

Како не дивимся / Твоему о нас промышлению, Богомати, / яко от Печерскаго удела Твоего / в землю Брянскую иконою Твоею изшла еси, / якоже Сын Твой рече учеником Своим: / и во иных странах должен есмь проповедати. / Темже глас целования Твоего таинственно слышаще, / играим радостно, / Духом просвещаеми.

Даровала еси граду Брянску / Свенский-Печерский образ Твой, Владычице, / яко стену небориму / и источник чудес, / имже советы злославных разоряются / и полки супостат далече отгоняются, / вся же земля Русская икону сию почитает, / милости Твоя, от нея являемая, / прославляющи, Приснодево.

О, преславнаго чудесе! / Очи благочестиваго князя Романа помрачишася, / да вся земля Брянская просветится / благодатию иконы Царицы Небесная, / очистим убо чувства / и узрим свет веры православная, / знаменами от иконы сея являемый, / да тьмы вечныя избегнем, / Богородицею спасаеми.

Радостная пения и благодарная / Тебе, Мати Дево, / Свенская обитель по достоянию приносит, / яко место сие избрала еси / и образом Твоим чудотворным / обитати zde изволила еси, / не отврати убо Лица Твоего от

нас, Пречистая, / верую и любовию Тя воспевающих, / яко Благоутробну.

**Слава, глас 6:**

Днесь во гласе хвалебнаго пения / духовное торжество составим, / достойно почитающе Свенскую икону Царицы Богородицы, / тою бо очи благовернаго князя Романа просветила есть, / до ныне же бесы изгоняет, недуги исцеляет, / напастей избавляет и монахов в подвизех укрепляет, / врагов устрашает и православие утверждает, / тепле молящися ко Господу / о спасении душ наших.

**И ныне, Триоди.**

**Вход. Прокимен дне. Чтения три Богородицы.**

**На литии стихира Триоди литийная мимошедшей недели и Богородицы стихира, глас 1:**

Приидите, вернии, / праздник Свенския иконы / Пресвятыя Богородицы составим, / ейже со страхом служат силы Небесныя, / припадают архиереи и священницы, / монаси и вси православнии, умиленно взывающе: / о, Мати Божия, спаси землю Русскую, / исцели сокрушение ея / и верныя люди утеши Твоя.

**Слава, и ныне, глас 5.**

Воспойте, людие, / Матери Бога нашего воспойте, / се бо, на Небеси царствующи, / сущих на земли посещает /и благодать Свою иконам Своим дарует, / темже образ Ея любезно лобызающе, / прилежно молим / даровати Православней Церкви утверждение / и душам нашим велию милость.

**На стиховне стихиры, глас 2.**

**Подобен: ДOME Евфрафов:**

Земле Брянская, / красуйся и ликуй, / се бо, Свенский образ / Пречистыя Богоматере / пределы твоя осеняет.

**Стих: Помяну имя Твое / во всяком роде и роде.**

Благодатию иконы Твоея, / Царице Небесная, / Православие утверждаеши, / исцеления источаеши / и напастей избавляеши.

**Стих: Лицу Твоему / помолятся богатии людстии.**

Лицу Твоему, Дево, / архиереи и священницы / монаси и вси православнии / благоговейно поклоняются / и со Ангелы служат.

**Слава, глас и подобен тойже:**

Взбранная Воеводо / православно чтущих Тя, / Владычице Богородице, / Свенскою иконою Твоею / от видимых и невидимых враг нас огради.

**И ныне, Триоди.**

**На благословении хлебов тропарь, глас 5:**

Пресвятая Дево Богородице, / земли Брянстей благословение и покров / Свенский—Печерский образ Твой даровала еси, / имже Православие утверждает, / ереси и расколы побеждаеши, / исцеления источаеши, / нашествия иноплеменных отражаеши / и междоусобныя брани умиряеши, / темже благодарно воспеваем Тя, / Отечества нашего похвалу и заступление.

**НА УТРЕНИ**

На Бог Господь тропарь Триоди дважды. Слава, и ныне, Богородицы.

По 1-м стихословию седален Триоди.

Слава, и ныне, Богородицы, глас 4:

Явлением милостей Твоих, Мати Божия, / да веселятся православных собори,  
/ чтущия чудотворный Свенский образ Твой, / еретическое же сонмище да  
посрамится / и, яко прах, да возметется от лица Брянския земли.

По 2-м стихословию седален Триоди.

Слава, и ныне, Богородицы, глас 4:

Наставница еси монахов, Приснодево, / темже призри на обитель  
Свенскую, / юже благоверный князь Роман на месте, Тобою избранном,  
созда, / яко кивот чудотворныя иконы Твоя, / и присно сию соблюдай,  
подвигающихся же в ней спасай.

Величание:

Достойно есть / величати Тя, / Богородице, / земли Русския Царицу  
Небесную, / Свенский образ Твой в ней прославльшую.

Псалом избранный:

1 лик: Освятит есть селение Свое Вышний.

2 лик: Вся слава Дщере Царевы внутрь.

1 лик: Посли свет Твой и истину Твою, та мя настависта и введоста мя в гору  
святую Твою.

2 лик: Предста Царица одесную Тебе.

1 лик: В ризах позлащенных одеяна и преиспещрена.

2 лик: Преславная глаголашася о Тебе, граде Божий.

1 лик: Слыши, Дщи, и виждь, и приклони ухо Твое.

2 лик: И возжелает Царь доброты Твоя, зане Той есть Господь Твой.

1 лик: Лицу Твоему помолятся богатии людстии.

2 лик: Не удали помощь Твою от мене, на заступление мое вонми.

1 лик: В оньже аще день призову Тя, скоро услыши мя.

2 лик: Спаси мя милостию Твоею.

1 лик: Возвеселятся вси уповающи на Тя, и похвалятся о Тебе любящими  
имя Твое.

2 лик: Помяну имя Твое во всяком роде и роде.

По полиелеи седален, глас 4:

Благословенная Владычице, / святой образ Твой зряще, / прилежно  
молим Тя: / на камени правыя веры рабы Твоя утверди.

Слава, и ныне, глас тойже:

Ликуй и красуйся, Брянская земле, / имущи в себе неоскудный источник  
благодати - / Свенскую икону Пречистыя Девы, / Еяже ради видимыя и  
невидимыя враги прогоняются, / еретицы посрамляются, / вернии же  
любовию неисчетныя Ея милости величают.

По 50-м псалме стихира, глас 6:

По грехом нашим / умножишася в нас безумнии, / иже глаголют в  
сердцах своих, яко Бога несть / и проповедуют учения пагубная и  
развращенная, / малодушныя от Святыя Церкви отторгающе, / но, о, Пречистая  
Богородице, / якоже древле очи благовернаго князя Романа просветила еси / и

иноплеменных от града Брянска отгнала еси, / сице заблуждшия просвети и злославныя устраши, / и спаси души наша.

## Канон Триоди и Богородицы канон. Глас 1.

### Песнь 1

*Ирмос: Воскресения день, / просветимся, людие, / Пасха, Господня Пасха: / от смерти бо к Жизни /и от земли к Небеси /Христос Бог нас преведе, /победную поюция.*

Воскресения день Христа Бога нашего / и благодать Пречистыя Его Матере / приидите, православных собори, согласно воспоим, / благодарственная поюще.

Очистим чувства и узрим очима веры / Пресвятую Богородицу, / грядущую от Печерскаго удела Своего / посетити Брянскую землю / и Свенскую икону Свою в ней прославити.

Небеса убо достойно да веселятся, / земля же Русская да радуется, / да празднует же град Брянск / и Свенская обитель да торжествует, / почитаючи икону Богоматере.

Очи благовернаго князя Романа просветила еси, / тепле молящагося Тебе, Дево Всенепорочная, / благодатию Сына Твоего, / из гроба днесь возсиявшаго.

### Катавасия Триоди

### Песнь 3

*Ирмос: Приидите, пиво ти ем новое, / не от камене неплодна чудодеемое, / но нетления источник, / из гроба одождивша Христа, / в Нем же утверждаемся.*

Приидите, песнь воспоим новую / Пречистей Деве Богородице, / честный образ Ея обстояще любовию, / на горе Свенстей Гору одушевленную православно величающе.

Приидите, благодать исцелений душ и телес почерпем / от источника неистощимаго - / Свенския иконы Богоматере, / Еюже во истинней вере утверждаемся и душетленная учения низлагаем.

Ныне вся исполняются радости, / архиереи и священницы, монаси и мирстии, / празднующе светло торжество милостей Твоих, Богоневесто, / Свенским образом нам явленных.

Вчера зрениа лишися благоверный князь Роман, / да явятся на нем дела Царицы Богоотроковицы, / ныне же ясно зрит икону Ея, / землю Брянскую чудеса облистаящую.

### Кондак и икос Триоди.

### Седален Триоди. Слава, и ныне, Богородицы, глас 4:

Предварившии утро священницы, провождавшии от обители Киево-Печерския / в пределы Брянския икону Твою, Всепетая Владычице, / не в ладии, но на дубе близ Свены реки обретоша ю, / слышав же сия, князь Роман со слезами вопияше: /О Пресвятая Дево! даруй ми зрети чудный образ Твой. и свет Сына Твоего, спасающаго род человеческий.

### Песнь 4

**Ирмос:** *На Божественной стражи / Богоглаголивый Аввакум / да станет с нами и покажет / светоносна Ангела, / ясно глаголюща: / днесь спасение миру, / яко воскрес Христос, / яко Всесилен.*

**На** Божественной стражи / в молитвенном бдении пред Свенскою иконою станем, / купно с преподобными Антонием и Феодосием моляще Пречистую / спасти землю Русскую.

**Богоотец** убо Давид / пред санным ковчегом скакаше, играя, / чада же Твоя, Богомати, / пред образом Твоим ликующе, / чудеса его прославляют, / имиже спасаеши нас от бед и зол.

**Телесныя** очи смотрением Божиим помрачены имея, / благочестивый князь Роман сердечныма очима провиде волю Твою, Богородице Дево, / о создании обители иноком на месте, Тобою избраннем.

**Якоже** древле супостат, обитель Твою окрадших, ослепила еси, Владычице, / и достояние братии возвратила еси, / тако ныне зловерныя помрачи, / заблуждшия же Матери-Церкви возврати.

### **Песнь 5**

**Ирмос:** *Утренюем утреннюю глубоку / и вместо мира песнь принесем Владыце, / и Христа узрим, / Правды Солнце, / всем жизнь возсияюща.*

**Утренюем** утреннюю глубоку, / и с пением добродетели принесем Владычице, глаголюще: / сподоби рабы Твоя свет узрети присносияющий.

**Безмерное** Твое благоутробие, Дево, / игумен Свенския обители с братиею зряше, / ихже от напрасныя смерти при разрушении храма сохранила еси.

**Приступим**, священоснии, любопразднственными чинми / к Свенскому образу Богоматере днесь, / имже тьма страстей наших отгоняется.

**Просвещаеши** Божественными лучами благодати иконы Твоя, Всепетая, / духовною и телесною слепотою недугующих.

### **Песнь 6**

**Ирмос:** *Снизшел еси в преисподняя земли / и сокрушил еси веревы вечныя, / содержащая связанная, Христе, / и тридневен, яко от кита Иона, / воскресл еси от гроба.*

**Пришла** еси милостивно, Мати Божия, / честным Твоим образом к благоверному князю Роману, / якоже Сын Твой посла образ Свой князю Авгарю, / и просветила еси очи его.

**Возводиши** держимых скорбьми и болезнями, Богоневесто, / к терпению, смирению и упованию спасения, / пред Свенскою иконою Твоею тепле помощь Твою призывающих.

**Спасе** наш Преблагий, / Пречистыя Матере Твоя мольбами / Церковь Твою Святую от ересей и расколов непоколебиму сохрани / и заблуждшия на путь правый обрати.

**Сохрани** во истинней вере чтущия Тя, Владычице, / знамении и чудесы от Свенския иконы Твоя / являющи благодать Божию, Православней Церкви присущую.

### **Кондак, глас 3:**

**Яко** цвет неувядаемый / Лавры Киево-Печерския / чудная икона Твоя, Владычице Богородице, / на древе близ Свены реки обретеса, / являющи место новаго вертограда духовнаго / и благоуханием чудес исполняющи

притекающих к ней, / темже и на предняя пробави милости Твоя, Пречистая,  
/ православно Тя величающим.

**Икос:**

Земная на земли оставльше, / и мысли от страстей очистивше, / вперим  
зрение вкупе и чувства к Пречистой Богоматери, / Свенского образа Ея  
дивное вознесение на древо / и чудеса его благодарно прославляюще, / и  
умиленно возопиим: / не остави рабы Твоя, Владычице, / иноков,  
подвизающихся на месте, Тобою избраннем, укрепи, / град Брянск и  
всю русскую землю благодатию Твоею покрый, / утеши нас, яко Мати,  
настави, яко сынов, / православно Тя величающих.

**Песнь 7**

**Ирмос:** *Отроки от печи избавивый, / быв Человек, страждет яко смертен, /  
и страстию смертное / в нетления облачит благолепие, / един Благословен  
/отцев Бог и Препрославлен.*

Отроки от печи избавивый, Владычице, Сын Твой и Бог, / многожды  
избавляше град Брянск и обитель Свенскую от супостат, / мольбами Твоими,  
едина Благословенная.

**В** воню мира благодати Свенския иконы Твоя притекающе. Пречистая,  
/ Небесное Миро рождающая, / благоуханием познания Христова исполняемся /  
и злосмрадия зловерия избавляемся.

Смерти празднуем умерщвление воскресением Христа, / злочестивых же  
посрамление и бегство милосердием Приснодевы, / темже пред иконою Ея  
ликующе, / Заступницу нашу воспеваем.

**Яко** воистинну священный / и спасительный, и светоносный, Богомати,  
Свенский образ Твой, / верую бо покланяющимся ему, даруеши исцеление / и  
от напастей избавление.

**Песнь 8**

**Ирмос:** *Сей нареченный и Святый День - / един суббот царь и господь, /  
праздников праздник / и торжество есть торжество, / в оньже благословим  
Христа* во веки.

Сей нареченный и святой день / всех православных земли Брянския  
созывает к прославлению Божия Матере, / ради чудотворныя Свенския Ея  
иконы.

**Призри,** Пресвятая Дево, на люди Твоя, / пред иконою Свенскою  
молящихся Тебе, / и прошения исполни / о Тебе благословящих Христа во  
веки.

**Отче** Вседержителю, и Слове, и Душе, / молитвами Богородицы  
Церковь Православную утверди, / Отечество наше в мире сохрани / и спаси  
благословящих Тя во веки.

**Приидите,** иноков собори, / радостно благодарение Приснодеве принесем,  
/ Свенским образом Своим / благословение Печерския Лавры земли Брянстей  
даровавшей.

**Песнь 9**

**Ирмос:** *Светися, светися, /Новый Иерусалиме, /слава бо Господня /на тебе  
возсия, / ликуй ныне / и веселися, Сионе, / Ты же Чистая, красуйся,  
Богородице, / о востании Рождества Твоего.*



Светися, светися, славный граде Брянск славою Свенского образа Богоматере, / ликуй ныне и веселися вся Русская земле, / покровом Владычицы хранимая.

О Божественного, о любезного, о сладчайшего Твоего Лица, Богоневесто, / имже пребывати с нами изволила еси, / егоже вернии утверждение надежды спасения имуще радуемся.

О Мати Божия, в молитву Тебе приводим Антония, Феодосия и всех Печерских и Брянских святых, / ихже предстательством сподоби нас невечерняго дне Царствия Сына Твоего.

Согласно, Дево, Тебе блажим вернии, / знамения и чудеса Свенския иконы Твоея благодарно воспоминающе / и востание рождества Твоего воспевающе.

**Светилен:**

Якоже древле просветила еси телесныя очи благоверного князя Романа / благодатию Свенския иконы Твоея, Всепетая Богородице, / тако и ныне омраченныя зловерием, Божественною лучею Сына Твоего просвети, / православныя же во свете Лица Его ходити утверди.

**Слава, и ныне, Триоди.**

**На хвалитех стихиры Триоди 3 и Богородицы стихиры 3, глас 1.**

**Подобен: Небесных чинов:**

Небесныя силы радуются / и страхом служат чудней Божия Матере иконе, / на древе близ Свены реки ю поставляюще, / и к веселию град Брянск и всю землю Русскую созывают. / Приидите, почерпем благодать, образом сим являемую / во спасение душ наших.

Твоего предстательства уверение / и милосердия Твоего явление / Свенская-Печерская икона Твоя, Владычице, показася нам, / еюже различных обстоятельств избавляемся / и благословение на добрая дела приемлем, / яко на Тя упование возложихом.

Монахов русских первоначальники, / преподобных Антония и Феодосия, / преподобный Алипий предстоящими Тебе изобрази / и рождшемуся от Тебе Божию Слово, / Дево и Мати Чистая, / монашескаго чина основание непоколебимое.

**Слава,**

**Триоди.**

**И**

**ныне,**

**глас**

**8.**

**Подобен: О, преславнаго чудесе:**

О, преславнаго чудесе! / Небесе и земли Царица / от святых сродников наших умоляемая / до ныне землю Русскую покрывает / и Лица Своего изображении милостивно обогащает. / О, Владычице Державная! / Не престани и на будущее время / во утверждение на Руси православия / милости и чудеса изливати до века. Аминь.

**НА ЛИТУРГИИ**

**Блаженны от канона Триоди рядовая песнь, на 4 и Богородицы песнь 6-я, на 4: По входе тропари Триоди и Богородицы. Слава, кондак Триоди. И ныне, кондак Богородицы. Прокимен, Апостол, Аллилуиа, Евангелие и причастен прежде ряда Триоди, потом Богородицы.**

**МОЛИТВА**

О, Всемилостивая Мати, Пречистая Дево Богородице, Возбранная Воеводо православных! Благодарным сердцем и усты славословим Тя присно пред Свенскою иконою Твоею, юже яко Божественное украшение Церкви Русския и залог милости Твоя верным людем даровала еси. Сею бо иконою благодать Божию, Православней Церкви присущую, являеши, егда точиши исцеления, напастей избавляеши, бесов прогоняеши, нашествия иноплеменных отражаеши.

Темже прилежно молим Ти ся, Богомати, пробави и на предняя великия милости Твоя любовию чтущим Тя, Православие утверди, отпадшия от правыя веры к познанию истины направи и уста нечестивых, хулящих Святую Церковь, загради. Отечеству нашему мир и на враги победы даруй, огради нас от нахождения супостат, междоусобной брани и всякаго зла, паче же от душегубительных страстей свободы, во еже умрети миру и жити Сыну и Богу Твоему в соблюдении заповедей Его. И сподоби нас, Предстательнице наша непостыдная, на Страшнем Суде одесную Престола Божия стати и с лики Ангелов и святых тамо восхваляти пречестное имя Сына Твоего, со Безначальным Его Отцем и Пресвятым Духом во веки. Аминь.



Месяца Августа в 17-й день.  
Празднование Пресвятей Владычице нашей Богородице и Приснодеве  
Марии ради иконы Ея, именуемая "Свенская - Печерская"  
На велицей вечерни  
На Господи, воззвах: стихиры на 8 : праздника 3,  
Свенския 5 глас I. Подобен: О дивное чудо:

О, дивное чудо! / Благая Заступница / усердныя молитвы верных  
приемши, / силою Своею Божественною / и пособием Свенскаго образа  
Своего / зловерных супостат далече отгоняет, /и град Брянск и окрестныя  
веси веселия исполняючи, / Ейже возопиим, вернии, / покровом Ея  
осеняеми: / Благодатная, радуйся, /с Тобою Господь, / подай чтущим Тя  
велию милость.

Ни откуда надеющися / помощи уллучити, / токмо Тебе молящися, Пречистая,  
/ и Ангелом говейную икону Твою / по стогнам града людие обносяще, / абие  
весть об избавлении / от нашествия вражия получиша / и благодарно воспеша  
Ти: / Благодатная, радуйся, / с Тобою Господь, / подай чтущим Тя велию  
милость.

Твое славят заступление / священных собори, / монаси и мирстии, / и воины  
христоролюбивии, / радуется земля Брянская, / Свенскою иконою Твоею  
красящися, / к нейже припадают вернии, / со Архангелы и Ангелы  
воспевающе: / Благодатная, радуйся, / с Тобою Господь, / подай чтущим Тя  
велию милость.

Крепкое Предградие / и Стену небориму, / обретше Тя, Владычице, / присно  
на помощь призываем: / избавляй нас от видимых и невидимых враг, / паче  
же от страстей безчестия, / собери расточенныя воедино, / православие  
соблуди непоколебимо. / Благодатная, радуйся, / с Тобою Господь, / подай  
чтущим Тя велию милость.

Вертоград духовный - / обитель Свенскую, / место, Тобою избранное, /  
идеже монахов лица / обстоят всечестную икону Твою, / грехов разрешения  
просяще / и жития исправления, / и причастия Божественныя славы Твоея, /  
не остави, Всепетая, / но благоутробно ущедри, / дарующи чтущим Тя велию  
милость.

Слава, и ныне, праздника, глас 2. Яже Небес вышшая сущи:  
Вход. Прокимен дне. Чтения три Богородицы.

Бытия чтение (глава 28):

Изыде Иаков от студенца клятвеннаго и иде в Харрань./ И обрете  
место, и спа тамо: зайде бо солнце,/ и взят от камня места того, и положи  
возглавие себе, и спа на месте оном./ И сон виде./ И се лествица, утверждена  
на земли, еяже глава досязаше до небес,/ и Ангели Божии восхождаху и  
низхождаху по ней./ Господь же утверждашеся на ней и рече:/ Аз Бог  
Авраамов, отца твоего, и Бог Исааков, не бойся:/ земля, идеже ты спиши на  
ней, тебе дам ю и семени твоему./ И будет семя твое, яко песок земный, и  
распространится на море, и ливу, и север, и на востоки:/ и возблагословятся о  
тебе вся колена земная и о семени твоём./ И се Аз с тобою, сохраняяй тя на  
всяком пути, аможе аще пойдеши./ И возвращу тя в землю сию, яко не имам  
тебе оставити, дондеже сотворити Ми вся, елика глаголах тебе./ И воста

Иаков от сна своего, и рече:/ яко есть Господь на месте сем, аз же не ведех./ И убося, и рече: яко страшно место сие;/ несть сие, но дом Божий, и сия врата Небесная.

**Пророчества Иезекиилева чтение (главы 43 и 44):**

Так о глаголет Господь:/ будет от дне осмаго и прочее, сотворят иереи на олтари всесожжения вашего/ и яже спасения вашего,/ и приму вы, глаголет Адонаи Господь./ И обрати мя на путь врат святых внешних,/ зрящих на востоки, и сия бяху затворена./ И рече Господь ко мне:/ врата сия затворена будут и не отверзутся,/ и никтоже пройдет сквозе их;/ яко Господь Бог Израилев пройдет ими, и будут затворена./ Яко Игумен сядет в них снести хлеб,/ по пути Еламских врат внидет и по пути его изыдет./ И введе мя по пути врат святых, сущих к северу, прямо храму,/ и видех, и се исполнь славы храм Господень.

**Царств третьих чтение (глава 8):**

Бысть, яко соверши Соломон еже создати Дом Господень. И собра вся старцы Израилевы в Сион вознести кивот завета Господня из града Давидова, сей есть Сион. И взяша священницы кивот завета Господня, и скинию свидения, и вся сосуды святая, яже в Скинии свидения. И царь, и весь Израиль пред кивотом. И внесоша священницы кивот завета Господня на место его, в давир храма, во святая святых, под крила Херувимов. Яко Херувими бяху распростерты крилами над местом кивота, и покрываху Херувими над кивотом и над святая его свышше. И не бе в кивоте, кроме двух скрижалей завета, яже положи тамо Моисей в Хориве, яже завеща Господь. И бысть, яко изыдоша священницы от святого, и облак исполни дом. И не возмогоша священницы стати служити от лица облака, яко исполнися славы Дом Господа Бога Вседержителя.

**На литии стихиры, глас 3:**

Воспойте Господеви, доли и холми, / дубравы и реки Брянския земли, / се бо, Царица Богоотроковица / Свенским-Печерским образом Своим, / яко щитом несокрушимым / нашествие злочестивых отражает, /и в бегство неудержимое тех обращает, / спасаючи от лютых град и чада Своя.

Державное Твое заступление / от сопротивных нахождения и веры поругания / Свенскою иконою нам дарованное / достойно празднующе, Владычице, / прилежно молим Тя: / моли о людех Российских, / да николиже козньми вражиими от правыя веры отвратятся / и в благочестии непоколебими да пребудут.

**Слава, и ныне, глас 8.**

**Подобен:** О преславнаго чудесе:

О, преславнаго чудесе! / О Божия к нам, грешным, долготерпения! / Грозное Божественное прещение врази разумевше, / благодатию Свенскаго образа Твоего, Царице Небесная, / страхом одержимии, / в бегство внезапное обратишася, / силою свыше гоними, / град же Твой и люди веселия исполнишася, / благодарно Тя величающе.

**На стиховне стихиры, глас 4:**

Веселится днесь светло / славный град Брянск и Свенская обитель, / яко святую Твою икону, Владычице, / Божественными чудесы прославила еси / и полки вражия вспять обратила еси, / яко Возбранная Воеводо Непобедимая.

**Стих:** Помяну имя Твое / во всяком роде и роде.

Воинства православнаго благопоспешение, / борцов мужество, храбрых Споборнице, / безпомощных Защитнице, / молим Тя крепость оружию нашему даровати, / да низложатся видимыя и невидимыя враги, / возстающия на ны, / Тобою бо победы воздвигнутся.

**Стих:** Лицу Твоему / помолятся богатии людстии.

Знамение победное от иконы Богоматере видевшие, / праздник честен составим, / и радостно воспоем Преславную нашу Заступницу, / землю Русскую в достояние Себе избравшую, / и на всяком месте благодать Свою являющую, / да пребудут покров и милость Ея над нами во веки.

**Слава, и ныне, праздника. Глас 2:** Всенепорочная Невеста: На благословении хлебов тропарь Свенския: дважды и праздника: единожды. Тропарь, глас 5:

Пресвятая Дево Богородице, / земли Брянстей благословение и покров / Свенский-Печерский образ Твой даровала еси, / имже православие утверждаеши, / ереси и расколы побеждаеши, / исцеления источаеши, / нашествия иноплеменных отражаеши / и междоусобныя брани умиряеши, / темже благодарно воспеваем Тя, / Отечества нашего похвалу и заступление.

На утрени

На Бог Господь тропарь праздника: дважды, слава и ныне Свенския.

По 1-м стихословии седален, глас 2:

Егда приступиша ко граду Брянску свирепии ратницы, / тогда людие, Свенский образ Твой по стогнам града обносяще, со слезами вопияху Тебе: / о, Пречистая Владычице Богородице, / по грехом нашим наидоша сия на ны, / но даруй нам время на покаяние, / не предаждь чада Твоя в руки зловерных, / Твое бо есмы достояние, спаси нас.

**Слава, и ныне, праздника, глас 3:** В Небесная мысленная Твоя душа:

По 2-м стихословии седален, глас 4:

Днесь град Брянск победным заступлением Твоим хвалится, Мати Божия, / и благовернии людие благоговейно лобызуют Свенский образ Твой, умильно зовуще: / о, крепкая наша Помощнице и оружие на враги непостыдное, / не забуди покрывати христоименитыя рабы Твоя, / и неотступно пребывай с нами во веки.

**Слава, и ныне, праздника, глас тойже:** В руце нас ради вочеловечшагося:

**Величание:**

Достойно есть / величати Тя, / Богородице, / земли Русския Заступницу Небесную, / Свенский образ Свой в ней прославльшую.

**Ино величание:**

Величаем Тя, / Пресвятая Дево, / и чтим образ Твой святой, / имже от нахождения зловерных / град Твой избавила еси.

**Псалом избранный:**

**1 лик:** Освятит есть селение Свое Вышний.

**2 лик:** Предста Царица одесную Тебе.

1 лик: В ризах позлащенных одеяна и преиспещрена.

2 лик: Вся слава Дщере Царевы внутрь.

1 лик: Преславная глаголашася о Тебе, граде Божий.

2 лик: Слыши, Дщи, и виждь, и приклони ухо Твое.

1 лик: И забуди люди Твоя, и дом отца Твоего.

2 лик: И возжелает Царь доброты Твоея, зане Той есть Господь Твой.

1 лик: Лицу Твоему помолятся богатии людстии.

2 лик: Не удали помощь Твою от мене, на заступление мое вонми.

1 лик: В оньже аще день призову Тя, скоро услыши мя.

2 лик: Спаси мя милостию Твоею.

1 лик: Возвеселятся вси уповаующии на Тя, и похвалятся о Тебе любящии имя Твое.

2 лик: Помяну имя Твое во всяком роде и роде.

По полиелеи седален, глас 4:

Безпомощным Помоще и ненадеющимся Надеждо, / православных похвало, злославных же посрамление, Богородице Дево, / якоже древле град Брянск от нахождения супостат избавила еси, / сие и ныне Матерними Твоими щедротами посети чтущих Свенский образ Твой, / Отечество наше укрепи, / Церковь Святую непоколебиму от ересей и расколов соблюди, / и Православие в мире сохрани.

Слава, и ныне, тойже.

Степенна, 1-й антифон 4-го гласа. Прокимен : Слыши, Дщи, и виждь, и приклони ухо Твое. Стих: Отрыгну сердце мое слово благо: Всякое дыхание: Евангелие от Луки 4 зачало.

По 50-м псалме стихира, глас 6:

По грехом нашим/ умножишася в нас безумнии,/ иже глаголют в сердцах своих, яко Бога несть/ и проповедуют учения пагубная и развращенная,/ малодушныя от Святыя Церкви отторгающе,/ но, о, Пречистая Богородице,/ якоже древле очи благоверного князя Романа просветила еси/ и иноплемennых от града Брянска отгнала еси,/ сие заблуждшия просвети и злославныя устраши,/ и спаси души наша.

Канон праздника, кир Иоанна Дамаскина. Глас 4.

И Свенския канон, егоже краегранесие: Радуйся, Благодатная, Свенская похвало. Глас тойже.

Песнь I. Ирмос: Отверзу уста моя:

Радуйся, Брянская земле, и веселися, Свенская обитель, велегласно по преславное заступление Божия Матере, Яже Свенскою иконою Своею верныя люди от супостат избави.

Аще не бы Твоя милость к нам, Преблагословенная Владычице, в мале бы врази лютии град Твой разориша и святыни православныя поруганию предаша, но сих вспять обратила еси.

Днесь церковная расширяются недра, приемлюще богатство благодати Девы Богородицы, Свенскою бо иконою Своею православныя от видимых и невидимых враг ограждает.

Ужасошася иноплеменных полчища и побегоша, Божественным прещением гоними, преложиися бо праведный Божий гнев на милость к нам ходатайством Пречистыя Богородицы.

**Песнь 3. Ирмос:** Твоя песнословцы:

Спасение православно величающим Тя соделала еси посреде земли Брянския, Богородице Дево, воздвиженной бо иконе Твоей священных руками, воздух освятися и полки бесовския отгнашася.

Явлением милости Твоея, Мати Божия, да веселятся православных собори, чтущии чудотворный Свенский образ Твой, еретическое же сонмище да посрамится и, яко прах, да возметется от лица Брянския земли.

Благословенная Владычице, десную стопу Твою утверждenu на камени на Свенском образе Твоем зряще, прилежно молим Тя: на камени правыя веры рабы Твоя утверди.

Лепотою чудес облечеса Свенская икона Богоматере, юже страхом и радостию лобызаем, братие, души и телеса очистивше, тою бо Царица Небесе и земли с нами пребывает.

**Кондак** **и** **икос** **праздника.**

**Седален. глас 1:**

Приидите, русстии собори, восхвалим стену и забрало Православнаго Отечества нашего, Царицу Богородицу, и Божественное сокровище - Свенскую икону Ея имуще, еюже град Брянск от нахождения иноплеменных избавися, победы над страстьми у Владычицы испросим, от Нея рождашася Бога славяще.

**Слава, и ныне, праздника, глас тойже:** Всечестный лик премудрых апостол:

**Песнь 4. Ирмос:** Седяй в славе:

Ангельстии чини страхом служат чудней Божия Матере иконе, человецы благоговейно покланяются, и вся тварь радуется, славящи силу непобедимую Пречистыя Владычицы.

Где суть дерзости злочестивых, всеу хвалящихся погубити достояние Твое, Богородице? Память их погибнет с шумом, Твое же заступление вси роди славят.

Образ Свенский Царицы Богородицы граду Брянску даровася яко стена неоторимая и щит несокрушим, егоже ныне обстояще любовию, Первообразней славу возсылаем.

Днесь летнюю память совершающе избавления Брянския земли от супостат пособием Богоматере, прилежно молимся Ей Православие утвердити, ереси же и расколы разорити.

**Песнь 5. Ирмос:** Ужасошася всяческая:

Аще и изошряют язык свой противу Церкви Православныя еретицы и раскольницы, и неправды сплетают руками своими - всеу труждаются, яко паучину разорит сия Господь Бог, якоже древле совет супостатов молитвами Богоматере.

Твоего к нам благоволения залог, Свенскую-Печерскую икону Твою, Владычице, стража неусыпна и заступление твердо граду Брянску даровала еси, на ню же взирающе, уныние отгоняем и веселия духовнаго исполняем.

Наставница еси монахов, Приснодево, темже призри на обитель Свенскую, юже благочестивый князь Роман на месте, Тобою избраннем, созда, яко



кивот чудотворныя иконы Твоя, и присно сию соблюдай, подвизающихся же в ней спасай.

**Архангельский глас** приносим Ти, Всепетая: Радуйся, Благодатная, Свенская похвало, с Тобою Господь и Тобою с нами, Егоже, яко

Матернее дерзновение имущи, молити не престай, овцы пажити Твоя от лютых волков сохранить невредимы.

**Песнь 6. Ирмос:** Божественное сие и всечестное:

**Явление** Божия благодати, Православней Церкви присуция, зрим в чудном заступлении града Брянска Свенския ради иконы Богоматере от нахождения воителей злославных.

**Сотвори ны достойны быти** таковаго дара милости Твоя, Всепетая Богородице, обращением от злых дел к благому житию, паче же православием нерушимым.

**Воззовите** вельми, священных уста, честне почитающе одушевленный Господень Кивот, и наша моления к Пречистей вознесите, благодарно Ея благость прославляюще.

**Елицы** благочестивии, приидите, поклонимся Свенстей Божия Матере иконе, подает бо певцем чудотворнаго Ея образа крепость на борителя диавола и грехов оставление.

**Кондак, глас 8:**

**Взбранней** Воеводе победительная, / яко избавльшеся от супостат благодатию Свенскаго Твоего образа, / благодарственная восписуем Ти, раби Твои, Богородице, / но яко имущая державу непобедимую / от всяких нас бед свободи, да зовем Ти: / радуйся, Невеста Невестная.

**Икос:**

**Егда** по грехом нашим восташа языцы горьции и борзии, / ходящии по широтам земли Русския, еже наследити селения чуждыя, / и святыни православныя поруганию предающии, / и на град Брянск, устремишася, / тогда сих свирепство превозможе молитва Пречистыя Богоматере / и древних чудес подобие нам явися: / Сия бо люди кающияся и к иконе Ея припадающия напрасныя смерти избави, / град же Свой и окрестныя веси от огня и меча сохрани, / полчища иноплеменные вспять обративши, / сего ради немолчно зовем Ей: / радуйся, Невесто Невестная.

**Песнь 7. Ирмос:** Не послужиша твари:

**Не** мощно нам отверсти уста, Мати Божия, греси наши, яко огонь печи вавилонския, превзыдоша наша главы, но в покаянии приими нас, благословящия Сына Твоего и Бога отец наших.

**Сниди** в пещь страстей наших, Пренепорочная, и пламя похоти в дух росы шумящ чистоты преложи, да благодарно зовем Ти: благословенна еси Рождшая Бога отец наших.

**Как**о воспоем чудо заступления Твоего, Благословенная Богородице? Ты бо слезныя мольбы и сокрушение сердец чад Твоих приемши, яко жертву чистую Сыну Твоему принесла еси, и праведный гнев Его угасила еси, рождшая Бога отец наших.



Аще и согрешихом, но не отступихом от Тебе, Владычице, - умильно вопияху людие пред Свенскою иконою Твоею, - не остави на поругание зловерным град Твой, благословящий Сына Твоего и Бога отец наших.

**Песнь 8. Ирмос:** Отроки благочестивыя в печи:

Яко столпом облачным, Свенскою иконою Твоею, град Твой покрываеши, Пречистая, и яко столпом огненным видимыя и невидимыя враги опаляеши, верныя же просвещаеши, превозносящия Сына Твоего во веки.

Прославим благочестно благодеяния Приснодевы, честный Ея образ обстояще любовию, Та бо люди Своя, пламенне Ю призывающия, милостию Своею ороси, злочестивыя супостаты от града Брянска далече отгнавши, темже Заступницу нашу превозносим во веки.

Огнем открыется и искусится коегождо дело, яково же есть, и аще пребудет, мзду приимем, аще же сгорит, отщетимся. Убоимся убо, братие, потопления огненнаго и под кров Богородицы притецем, превозносяще Сына Ея во веки.

Хврастие ересей и расколов, и соблазнов церковных Божественным огнем любви Божия попали, Царице Небесная, егоже Сын Твой прииде воврещи на землю, православныя же яко злато в горниле испытаний очисти, превозносящия Господа во веки.

**Песнь 9. Ирмос:** Всяк земнородный:

Всепетая Богородица на Небеси с Сыном и Богом Своим царствующи, на земли сущих благоутробно посещает, паче же тепле призывающим Ея скорая Помощница является, темже и град Брянск от нашествия супостат избавила есть.

Антония и Феодосия Печерских, монахов русских первоначальников, преподобный Алипий предстоящими Тебе изобрази, монашескаго чина Владычице, знаменуя присное их к Тебе о нас моление, с нимиже Тя величаем.

Ликуй и красуйся, Брянская земле, имущи в себе неоскудный источник благодати - Свенскую икону Пречистыя Девы, Ея же ради видимыя и невидимыя враги прогоняются, еретицы посрамляются, вернии же любовию неисчетныя Ея милости величают.

О, великая наша Заступнице и похвало, Пресвятая Богородице, честнейшая Херувим и славнейшая без сравнения Серафим, православия щите и оружие на враги непобедимое, по достоянию воспети Тя не могуще, во смирении сердца величаем.

**Светилен:**

Мати Божия, призри благосердно на благодарно чтущия Свенскую икону Твою, еюже град Брянск от нахождения зловерных избавила еси, и умоли Рождшагося от Тебе даровати Церкви Православней утверждение, Отечеству нашему на враги одоление и душам нашим спасение.

**Слава, и ныне, праздника:** От земли на Небеса преставльшися:

На хвалитех стихиры праздника 3, глас 6.  
И Свенския стихиры, глас 2.

**Подобен:** Киими похвальными венцы:

Киими благодарными усты / воспоем Богородицу? / Свенским-Печерским образом Своим / град Брянск и всю землю Русскую обогатившую / и

неотступно с нами пребывающую, / ныне же в Божественном торжестве / святых Своих иконы / подающую притекающим к Ней / великия милости.

Киими достойными песньми / восхвалим Богородицу? / Земли Русския Царицу Небесную, / православия утверждение, / злославия же посрамление, / в бедах сущим скорое поможение, / Еяже ради Свенския иконы / шатания иноплемнных на град Брянск Христос низложи, / имей велию милость.

Киими подвиги благочестия / обрадуем Богородицу? / Свенскою иконою Своею / благостроению державы Российския служащую / и междуособныя брани умиряющую, / не песньми токмо славяще, / но дела веры правыя славу воздающе, / да не отвратит Лица Своего от нас грех ради наших, / имущи велию милость.

Слава, и ныне, праздника, глас 3: Приидите, вси концы земнии:

Славословие великое. Тропарь Свенской.

Слава, и ныне, праздника. И отпуст.

На Литургии

Блаженны от обою канонов праздника, песнь 3-я, на 4, и от канона Свенския, песнь 6-я, на 4. По входе тропарь праздника и Свенския. Слава, кондак Свенския. И ныне, праздника. И прочая служба вся Богородицы.

Молитва

О, Всемиловитая Мати, Пречистая Дево Богородице, Возбранная Воеводо православных! Благодарным сердцем и усты славословим Тя присно пред Свенскою иконою Твоею, юже яко Божественное украшение Церкви Русстей и залог милости Твоя верным людем даровала еси. Сею бо иконою благодать Божию, Православней Церкви присущую, являеши, егда точиши исцеления, напастей избавляеши, бесов прогоняеши, нашествия иноплемнных отражаеши.

Темже прилежно молим Ти ся, Богомати, пробави и на предняя великия милости Твоя любовь чтушим Тя, Православие утверди, отпадшия от правыя веры к познанию истины направи и уста нечестивых, хулящих Святую Церковь, загради. Отечеству нашему мир и на враги победы даруй, огради нас от нахождения супостат, междуособныя брани и всякаго зла, паче же от душегубительных страстей свободы, во еже умрети миру и жити Сыну и Богу Твоему в соблюдении заповедей Его. И сподоби нас, Предстательнице наша непостыдная, на Страшнем Суде одесную Престола Божия стати и с лики Ангелов и святых тамо восхваляти пречестное имя Сына Твоего, со Безначальным Его Отцем и Пресвятым Духом во веки.

Аминь.